

月下獨酌

唐 李白

花間一壺酒、獨酌無相親。

舉杯邀明月、對影成三人。

月既不解飲、影徒隨我身。

暫伴月將影、行樂須及春。

我歌月徘徊、我舞影零亂。

醒時同交歡、醉後各分散。

永結無情遊、相期邈雲漢。

春望

唐 杜甫

國破山河在、城春草木深。

感時花濺淚、恨別鳥驚心。

烽火連三月、家書抵萬金。

白頭搔更短、渾欲不勝簪。